



O‘ZBEKISTON RESPUBLIKASI
MAKTABGACHA VA MAKTAB TA’LIMI VAZIRINING
BUYRUG‘I

O‘zbekiston Respublikasi Maktabgacha va maktab ta’limi vazirligi
huzuridagi Jamoatchilik kengashi to‘g‘risidagi nizomni yangi tahrirda
tasdiqlash haqida

O‘zbekiston Respublikasi Prezidentining “O‘zbekiston – 2030” strategiyasini “Yoshlar va biznesni qo‘llab-quvvatlash yili”da amalga oshirishga oid davlat dasturi to‘g‘risida” 2024-yil 21-fevraldagi PF-37-son Farmonida belgilangan vazifalar ijrosini ta’minlash maqsadida **buyuraman:**

1. O‘zbekiston Respublikasi Prezidentining “O‘zbekiston – 2030” strategiyasini “Yoshlar va biznesni qo‘llab-quvvatlash yili”da amalga oshirishga oid davlat dasturi to‘g‘risida” 2024-yil 21-fevraldagi PF-37-son Farmonining 4-ilovasi 23-bandi “Xalq xizmatidagi” davlat boshqaruvini tashkil etishda davlat organlari huzuridagi jamoatchilik kengashlarini samarali vositaga aylantirish bo‘yicha belgilangan vazifalar ijro uchun qabul qilinsin.

2. O‘zbekiston Respublikasi Maktabgacha va maktab ta’limi vazirligi huzuridagi Jamoatchilik kengashi to‘g‘risidagi nizom (yangi tahrirda) ilovaga muvofiq tasdiqlansin.

3. Vazir maslahatchisi (N.Mamaraimova) Jamoatchilik kengashi faoliyatini yangi tahrirdagi nizom asosida tashkil etilishini ta’minlasin.

4. Mazkur buyruq qabul qilinishi munosabati bilan O‘zbekiston Respublikasi Xalq ta’limi vazirining 2022-yil 22-fevraldagi “O‘zbekiston Respublikasi Xalq ta’limi vazirligi huzuridagi Jamoatchilik kengashi to‘g‘risidagi nizomni yangi tahrirda tasdiqlash haqida”gi 65-sonli buyrug‘i o‘z kuchini yo‘qotgan deb hisoblansin.

5. Ushbu buyruqning ijrosini nazorat qilishni o‘z zimmasida qoldiraman.

Vazir

X. Umarova

Toshkent sh.,
2024-yil 15- mart,
92-son

**O'zbekiston Respublikasi Maktabgacha va maktab ta'limi vazirligi
huzuridagi Jamoatchilik kengashi to'g'risidagi
NIZOM**

1-bob. Umumiy qoidalar

1. Mazkur nizom (keyingi o'rinlarda Nizom) Maktabgacha va maktab ta'limi vazirligi huzuridagi Jamoatchilik kengashining (keyingi o'rinlarda Jamoatchilik kengashi) asosiy vazifalari, funksiyalari, vakolatlarini va faoliyatini tashkil etish tartibini belgilaydi.

2. Jamoatchilik kengashi o'z ishini jamoatchilik asosida olib boradigan, doimiy faoliyat yurituvchi maslahat-kengash organi hisoblanadi.

3. Jamoatchilik kengashi Maktabgacha va maktab ta'limi vazirligi huzurida tashkil etiladi.

4. Jamoatchilik kengashining qarorlari tavsiyaviy xususiyatga ega.

5. Jamoatchilik kengashi o'z faoliyatida O'zbekiston Respublikasining Konstitutsiyasi va qonunlariga, O'zbekiston Respublikasi Oliy Majlisi palatalarining qarorlariga, O'zbekiston Respublikasi Prezidentining farmonlari, qarorlari va farmoyishlariga, O'zbekiston Respublikasi Vazirlar Mahkamasining qarorlari va farmoyishlariga, vazirlik buyruqlariga, mazkur Nizomga hamda boshqa qonun hujjatlariga amal qiladi.

6. Jamoatchilik kengashi to'g'risidagi Nizom va unga kiritiladigan o'zgartishlar hamda qo'shimchalar Vazir buyrug'i bilan tasdiqlanadi.

7. Jamoatchilik kengashi Maktabgacha va maktab ta'limi vazirining qarori bilan tashkil etiladi. Jamoatchilik kengashi to'g'risidagi Nizom va unga kiritiladigan o'zgartishlar hamda qo'shimchalar vazir buyrug'i bilan tasdiqlanadi.

**2-bob. Jamoatchilik kengashining asosiy vazifalari, funksiyalari, huquqlari
va majburiyatlari**

8. Maktabgacha va maktab ta'limi vazirligi tizimida amalga oshirilayotgan islohotlarning samaradorligini oshirish, innovatsion loyihalarni hayotga tadbiiq etishda keng jamoatchilik vakillari, davlat va nodavlat tashkilotlari hamda fuqarolik jamiyatining boshqa institutlari bilan samarali hamkorlikni yo'lga qo'yish, bu orqali sohani xalqqa yanada yaqinlashtirish bo'yicha olib borilayotgan siyosat va chora-tadbirlarning samaradorligini oshirishga ko'maklashishdan iborat.

Mazkur maqsadga erishish uchun Jamoatchilik kengashi quyidagi vazifalarni amalga oshiradi:

Maktabgacha va maktab ta'limi tizimida olib borilayotgan islohotlar va chora-tadbirlarni takomillashtirish bo'yicha jamoatchilik muhokamalarini tashkil etish;

fuqarolik jamiyati institutlari va nodavlat-notijorat tashkilotlari bilan hamkorlikda maktabgacha va maktab ta'limini rivojlantirish va bu yo'nalishdagi chora-tadbirlar samaradorligini oshirish bo'yicha takliflar ishlab chiqish;

maktabgacha va maktab ta'limi sohasida qabul qilingan qarorlar va qonun hujjatlarining natijadorligi, shuningdek, turli darajadagi davlat boshqaruvi va mahalliy davlat hokimiyati organlari, davlat korxonalarini va xo'jalik yurituvchi subyektlar tomonidan o'z funksiyalari va vazifalarini bajarish sifati va samaradorligi to'g'risida vazirlik xabardorligini oshirish;

maktabgacha va maktab ta'limi yo'nalishidagi targ'ibotga ko'maklashish va unda fuqarolik jamiyati institutlarining ishtirokini muvofiqlashtirish;

Jamoatchilik kengashlarining tartib-qoidalarini takomillashtirish yuzasidan ilg'or tajriba asosida tavsiyalar ishlab chiqish;

vazirlik tomonidan e'lon qilinadigan ma'lumotlarning hisobdorligi, ochiqdigi va sifati to'g'risida ma'lumotlar tayyorlash;

vazirlik faoliyati to'g'risida jamoatchilik fikrini kuzatib borish, tahlil qilish hamda vazirlikka yaqindan ko'mak berish;

vazirlik faoliyatining shaffofligini monitoring qilish;

birgalikda muloqot qilish, vazirlikning nodavlat notijorat tashkilotlari, ommaviy axborot vositalari va fuqarolik jamiyatining boshqa institutlari bilan samarali hamkorligini ta'minlash uchun vazirlikni fuqarolar bilan bog'lab turadigan "ko'priklarni" vazifasini bajarish;

maktabgacha va maktab ta'limi tizimidagi mavjud muammolar, sohadagi korrupsiyaviy holatlar to'g'risida vazirlikni xabardor qilish;

maktabgacha va maktab ta'limi sohasini davlat tomonidan tartibga solish tizimining ishlashi bilan bog'liq bo'lgan murojaatlar yuzasidan vazirlikni xabardor qilish;

vazirlik faoliyatini jamoatchilik fikri va ommaviy axborot vositalarida yoritish bo'yicha bajarilayotgan ishlarning natijalarini tahlil qilish, ularning samaradorligini oshirish va mavjud kamchiliklarni bartaraf etish yuzasidan takliflar ishlab chiqish.

9. Jamoatchilik kengashi zimmasiga yuklatilgan vazifalar va funksiyalarni bajarish uchun:

vazirlik tomonidan ishlab chiqilgan normativ-huquqiy hujjatlar loyihalarining jamoatchilik va ekspertlar muhokamasini ta'minlashda ishtirok etishi, unga Jamoatchilik kengashi xulosasini berish;

kun tartibidagi masalalar, hujjatlar loyihalari, maktabgacha va maktab ta'limi sohasini rivojlantirish siyosatini muayyan hudud, soha va tarmoqlarda amalga oshirilishi natijalari bo'yicha og'zaki yoki yozma ravishda o'zining ekspert sifatidagi fikrini bildirish hamda muhokama qilish;

jamoatchilik fikri va ommaviy axborot vositalarida e'lon qilingan materiallarni Jamoatchilik kengashi va vazirlik rahbariyatiga ko'rib chiqish uchun taqdim etish;

vazirlik tomonidan tashkil etiladigan bo‘lajak ochiq majlislar va boshqa ommaviy tadbirlar to‘g‘risidagi axborotni oldindan olish hamda mazkur tadbirlarda ishtirok etish;

vazirga Jamoatchilik kengashi vakolatiga kiradigan masalalar yuzasidan takliflar kiritish;

vazirlik yoki uning xodimlari ustidan kelib tushadigan shikoyatlarni talab qilib olish, o‘rganish va natijasi bo‘yicha vazirlik tomonidan ko‘rib chiqilishi majburiy bo‘lgan tavsiyalar berish, shuningdek vazirlik faoliyatining samaradorligini oshirishga qaratilgan fuqarolarning takliflari bilan tanishib chiqish;

vazirlik faoliyati samaradorligini oshirish bo‘yicha taklif va tavsiyalarni ishlab chiqish hamda amalga oshirish uchun zarur bo‘lgan vazirlikning axborotlari, statistika va boshqa materiallarini belgilangan tartibda olish;

Jamoatchilik kengashi o‘z faoliyatiga doir masalalar, bu borada qilinayotgan ishlar hamda majlislarida muhokama qilinadigan masalalarni yoritish bo‘yicha ommaviy axborot vositalari bilan hamkorlik qilish;

yuklatilgan vazifalarni bajarish uchun konferensiyalar, forumlar, seminarlar, davra suhbatlari va boshqa tadbirlarni tashkil etish huquqiga ega.

Jamoatchilik kengashi a‘zolari o‘z vakolatlariga kiritilgan masalalar yuzasidan vaqtinchalik ishchi guruh, ekspertlar guruhlarini tuzishlari mumkin.

10. Jamoatchilik kengashi o‘z faoliyatini amalga oshirishda:

jamoatchilik nazorati to‘g‘risidagi qonun hujjatlari talablariga rioya qilishi; vazirlik xodimlarining o‘z vakolatlari doirasida amalga oshiradigan faoliyatiga aralashmasligi;

vazirlik xodimlari faoliyat ko‘rsatishi uchun to‘sqinlik qilmasligi;

fuqarolarning or-nomusi va qadr-qimmatini tahqirlashga, ularning shaxsiy hayotiga aralashishga yo‘l qo‘ymasligi;

jamoatchilik nazoratini amalga oshirish davomida olingan axborotning, agar bunday axborotni tarqatish qonun bilan cheklangan bo‘lsa, maxfiyligiga rioya qilishi shart;

Jamoatchilik kengashi nomidan intervyu berish, uchrashuv, o‘rganish va boshqa ommaviy tadbirlarda ishtirok etish to‘g‘risida kengash raisini xabardor qilgan holda amalga oshirish;

Jamoatchilik kengashining zimmasida qonun hujjatlariga muvofiq boshqa majburiyatlar ham bo‘lishi mumkin.

Yuqoridagi talablarni bajarish Jamoatchilik kengashi tarkibiga kiruvchi barcha a‘zolar uchun majburiydir.

3-bob. Jamoatchilik kengashining tarkibini shakllantirish va a‘zolarining huquq va majburiyatlari

11. Jamoatchilik kengashi a‘ziligiga, qoida tariqasida, oliy ma‘lumotga ega, ta‘lim sohasida alohida bilim, ko‘nikmalarga ega bo‘lgan, shuningdek sohani rivojlantirishga qaratilgan amaliy takliflarni bera oladigan, sudlanmagan, zarur kasbiy fazilatlariga bo‘lgan, jamiyatda alohida e‘tiborga ega bo‘lgan, sohada

namunali xizmat ko'rsatgan mehnat faxriylari, jamoatchilik faoliyati sohalarida katta amaliy tajribaga ega obro'-e'tiborli fuqarolar, shuningdek nodavlat notijorat tashkilotlari, ommaviy axborot vositalari va fuqarolik jamiyatining boshqa institutlari vakillari orasidan tanlab olinadi.

Jamoatchilik kengashi a'zolarining soni 15 nafardan 20 nafargacha etib belgilanishi mumkin.

Bunda Jamoatchilik kengashi tarkibining 50 foizi nodavlat notijorat tashkiloti vakillaridan iborat bo'lishi lozim.

12. Jamoatchilik kengashining tarkibi vazir buyrug'i bilan har 2 (ikki) yilda tasdiqlanadi.

Jamoatchilik kengashining vakolat muddati yakunlanganidan so'ng o'z faoliyatini tugatadi va vazirlik tomonidan belgilangan tartibda Kengashning yangi tarkibi shakllantiriladi.

13. Jamoatchilik kengashining tarkibiga uning raisi, rais o'rinbosari va a'zolari kiradi.

14. Jamoatchilik kengashining raisi, rais o'rinbosari vazir tavsiyasiga asosan, Jamoatchilik kengashining a'zolari orasidan saylanadi.

Saylangan rais, rais o'rinbosari, vakolat muddati Jamoatchilik kengashi a'zolari tomonidan belgilanadi.

Vazirlikning Jamoatchilik kengashi ishini tashkil etishga mas'ul xodimi bir vaqtning o'zida kengash kotibi vazifasini ham bajaradi.

15. Quyidagi holatlarda Jamoatchilik kengashining raisi, rais o'rinbosari va a'zolari uning tarkibidan chiqarilishi mumkin:

kengash tarkibidan chiqish to'g'risida ariza bilan murojaat qilganida;

huquqbuzarlik, shuningdek jamiyatda o'rnatilgan axloq qoidalari hamda umum e'tirof etilgan normalarni qo'pol ravishda buzuvchi va kengash a'zosi nomiga dog' tushiruvchi hamda Jamoatchilik kengashi obro'siga putur yetkazuvchi harakatlar, nojo'ya ishlar sodir etganda;

kengash yoki vazirlik nomidan shaxsiy yoki boshqa manfaatlari yo'lida foydalanganda;

kengashi a'zolarining ko'pchilik fikri bilan ovozga qo'yilganda va oddiy ko'pchilik ovozi bilan ma'qullanganda;

Nizomda nazarda tutilgan o'z vazifalarini uzrli sabablarsiz muntazam ravishda bajarmaganda, shu jumladan Jamoatchilik kengashining majlislarida ishtirok etmaganda;

vafot etganda, shuningdek sudning qonuniy kuchga kirgan hal qiluv qarori asosida muomalaga layoqatsiz, bedarak yo'qolgan yoki vafot etgan deb topilganda; mazkur Nizom majburiyatlarni bajarmaganda.

16. Jamoatchilik kengashining tarkibi to'g'risidagi ma'lumotlar va unga kiritilgan o'zgartishlar ular tasdiqlangan paytdan boshlab 5 (besh) kun ichida vazirlikning rasmiy veb-saytida e'lon qilinadi.

17. Jamoatchilik kengashi raisi o'z vakolatlari doirasida:

Jamoatchilik kengashi faoliyatini tashkil etadi;

majlislarga raislik qiladi;

Jamoatchilik kengashi nomidan hujjatlarni imzolaydi;

Jamoatchilik kengashi qarorlarini amalga oshirish bo'yicha faoliyatni muvofiqlashtiradi;

vazirlik majlislarida maslahat ovozi huquqi bilan ishtirok etadi;

Jamoatchilik kengashining samarali ishini ta'minlash bo'yicha boshqa vakolatlarni amalga oshiradi.

18. Jamoatchilik kengashining raisi bo'lmagan taqdirda, uning vakolatlari va majburiyatlarini rais o'rinbosari bajaradi.

19. Jamoatchilik kengashi raisining o'rinbosari:

rais yo'qligida Jamoatchilik kengashining majlislarida raislik qiladi;

Jamoatchilik kengashi qarorlarining ijrosini nazorat qilish bo'yicha ishlarni tashkil etadi;

Jamoatchilik kengashining vakolatiga kiradigan masalalar bilan bog'liq murojaatlarni ko'rib chiqadi va natijalari bo'yicha tegishli hujjatlarni tayyorlaydi;

Jamoatchilik kengashi ishini samarali tashkil etish bo'yicha boshqa vakolatlarni amalga oshiradi.

20. Jamoatchilik kengashining kotibi:

Jamoatchilik kengashi faoliyatini uslubiy, tashkiliy-huquqiy va tashkiliy-texnik jihatdan ta'minlash masalalarini hal qiladi;

Jamoatchilik kengashining navbatdagi majlisiga barcha zarur materiallar o'z vaqtida tayyorlanishini ta'minlaydi, vazirlik xodimlaridan zarur hujjatlar va ma'lumotlarni so'rab oladi;

kun tartibiga muvofiq Jamoatchilik kengashi majlislari o'tkazilishini tashkil etadi;

Jamoatchilik kengashi o'tkaziladigan sana, joy va taklif etiladigan shaxslar ro'yxatini Jamoatchilik kengashining raisi bilan kelishadi;

Jamoatchilik kengashi a'zolarini va taklif etilgan shaxslarni Jamoatchilik kengashi majlisi o'tkaziladigan joy, sana va vaqt haqida xabardor qiladi;

Jamoatchilik kengashi qarorlarining ijro etilishi ustidan monitoring olib boradi va uning natijalarini jamoatchilik kengashi majlisida ko'rib chiqish bo'yicha takliflar kiritadi;

Jamoatchilik kengashi majlisining bayonnomasini rasmiylashtiradi va tasdiqlangan bayonnomaning Jamoatchilik kengashi a'zolari hamda boshqa manfaatdor shaxslarga jo'natilishini ta'minlaydi;

vazirlikning rasmiy veb-saytida Jamoatchilik kengashining tasdiqlangan a'zolari haqidagi ma'lumotlarni, shuningdek ularning aloqa ma'lumotlari (telefon, pochta va elektron manzillari)ni tayyorlaydi va har chorakda vazirlikka taqdim etib boradi;

Jamoatchilik kengashining yig'ilishlari va kun tartibidagi masalalar to'g'risidagi ma'lumotlarni vazirlikning rasmiy veb-saytida e'lon qilish uchun vazirlikka taqdim etadi;

ovoz berish natijalarini inobatga olgan holda ko'rib chiqilayotgan masala bo'yicha Jamoatchilik kengashi tavsiyasi loyahasini tayyorlaydi va imzolash uchun Jamoatchilik kengashi raisiga kiritadi;

21. Jamoatchilik kengashining a'zolari o'z majlislarida ko'rib chiqiladigan masalalarni muhokama qilish va hal qilishda o'z vakolatini boshqalarga o'tkazish huquqiga ega emas.

Jamoatchilik kengashining a'zolari:
o'z zimmlariga yuklatilgan vazifalarni bajarish uchun vazirlik tomonidan tashkil etiladigan hay'at majlislarida va boshqa ommaviy tadbirlarda ishtirok etadi;
Jamoatchilik kengashi ish rejalarining loyihalarini tayyorlaydi, ularni Jamoatchilik kengashida ko'rib chiqish uchun kiritadi va tasdiqlangan ish rejaları bajarilishini ta'minlaydi;
vazirlik faoliyatining samaradorligini oshirish bo'yicha taklif va tavsiyalarni ishlab chiqishda hamda amalga oshirishda qatnashadi;
vazirlik xodimlari, ularning oila a'zolari bilan uchrashuvlar o'tkazadi va ularning huquqlari, erkinliklari hamda qonuniy manfaatlarini ta'minlash bo'yicha takliflarni Jamoatchilik kengashiga kiritadi;
Jamoatchilik kengashining kun tartibiga kiritilgan masalalar yuzasidan tahliliy materiallar tayyorlaydi;
Jamoatchilik kengashining zimmasiga yuklangan vazifalar va funksiyalarga muvofiq boshqa vakolatlarni amalga oshiradi.

4-bob. Jamoatchilik kengashi yig'ilishlarini tashkil etish va o'tkazish tartibi

22. Jamoatchilik kengashi faoliyatining asosiy masalalari uning majlisida ko'rib chiqiladi. Jamoatchilik kengashining majlisi kengash raisi u yo'qligida esa uning o'rinbosari tomonidan zaruratga qarab, biroq yiliga kamida to'rt marta chaqiriladi.

Jamoatchilik kengashining navbatdan tashqari majlisi Jamoatchilik kengashi a'zolarining uchdan bir qismining yozma murojaati asosida chaqirilishi mumkin.

23. Jamoatchilik kengashining majlisi o'tkaziladigan vaqt, sana, joy va kun tartibi a'zolar e'tiboriga majlis bo'lishidan kamida uch kun oldin yetkaziladi.

Majlis bo'lishi haqidagi xabar kengash a'zolariga ijtimoiy tarmoqdagi sahifasiga xabarnoma jo'natish, uyali aloqa vositasiga qo'ng'iroq qilish, ish joyiga rasmiy xabarnoma jo'natish, vazirlik rasmiy veb-saytida e'lon berish va boshqa aloqa vositalari orqali ma'lum qilinishi mumkin.

24. Jamoatchilik kengashining majlisi, agar unda Jamoatchilik kengashi a'zolarining kamida 50 foizdan ortig'i (kvorum) ishtirok etgan taqdirda vakolatli hisoblanadi.

Majlisni o'tkazish uchun kvorum shakllanmagan taqdirda, Jamoatchilik kengashining yangi majlisi o'tkaziladigan sana e'lon qilinadi.

25. Jamoatchilik kengashining majlisida ishtirok etish imkoni bo'lmagan holatlarda, uning a'zosi majlis kun tartibidagi masalalar bo'yicha o'z fikrini yozma shaklda yuborishi mumkin. Bunda uning fikri majlisda ko'rib chiqiladi va ovoz berishda hisobga olinadi.

26. Jamoatchilik kengashining majlislariga boshqa davlat organlari, nodavlat notijorat tashkilotlari va fuqarolik jamiyati institutlarining vakillari, ommaviy axborot vositalari taklif etilishi mumkin.

27. Jamoatchilik kengashi majlislari onlayn, oflayn yoki gibrid formatda ham o'tkazilishi mumkin.

28. Jamoatchilik kengashi majlisi kun tartibining loyihasi kotib tomonidan Jamoatchilik kengashi a'zolarining takliflari va Jamoatchilik kengashi raisining topshirig'i asosida shakllantiriladi.

Shuningdek, vazirlik va kengash a'zolarining taklifiga ko'ra, Jamoatchilik kengashi majlislarida alohida muhim ahamiyatga ega bo'lgan masalalar kun tartibiga kiritilishi mumkin.

29. Jamoatchilik kengashining qarori majlisda ishtirok etayotgan Jamoatchilik kengashi a'zolarining oddiy ko'pchilik ovozi bilan qabul qilinadi. Ovozlar teng bo'lib qolgan taqdirda, kengash raisining ovozi hal qiluvchi hisoblanadi.

30. Jamoatchilik kengashining har bir a'zosi qabul qilinayotgan qarorlar bo'yicha o'zining fikrini yozma shaklda ifodalashga haqli. Uning fikri Jamoatchilik kengashi majlisining bayonnomasiga majburiy tartibda qo'shib qo'yiladi.

31. Jamoatchilik kengashi a'zolari majlis yakuni bo'yicha vazirlik tomonidan ko'rib chiqilishi va qarorlar qabul qilinishi majburiy bo'lgan tavsiyalar qabul qiladi.

32. Jamoatchilik kengashining majlisida qabul qilingan qaror bayonnoma bilan rasmiylashtiriladi. Jamoatchilik kengashi majlisining bayonnomasi kotib tomonidan imzolanadi, majlisga raislik qiluvchi tomonidan tasdiqlanadi va uch kun muddatda vazirlikka, Jamoatchilik kengashi a'zolariga va manfaatdor shaxslarga yuboriladi.

33. Jamoatchilik kengashining qarorini tezlik bilan qabul qilish zaruriyati tug'ilganda, uning raisi tashabbusi bilan qaror Jamoatchilik kengashining a'zolari bilan kelishilgan holda so'rov yo'li orqali rasmiylashtiriladi.

Vazirlik Jamoatchilik kengashining qabul qilgan qaroriga qo'shilmagan hollarda, Jamoatchilik kengashining qarorini olgan kundan boshlab o'n kundan kechikmay unga asoslantirilgan e'tirozini yozma shaklda yuboradi.

34. Jamoatchilik kengashining kotibi kengash a'zolari ko'magida Jamoatchilik kengashi qarorlari ijrosining borishini o'rganadi va ko'rib chiqadi, zarur bo'lgan hollarda, Jamoatchilik kengashining raisiga tegishli takliflar kiritadi.

35. Quyidagi holatlar Jamoatchilik kengashi faoliyati tugatilishiga sabab bo'ladi:

Nizomda belgilangan vakolat muddati yakunlanganidan so'ng;
o'z zimmasiga yuklatilgan vazifa va funksiyalarni yetarli darajada bajarmaganda;

vazirlik faoliyati va ishchanlik obro'siga putur yetkazilishga sabab bo'luvchi harakat yoki harakatsizlikni sodir etganda;

kengash a'zolari umumiy sonining 30 foizdan ortiq qismi a'zolikni tark etganda;

Jamoatchilik kengashi majlisida ishtirok etgan kengash a'zolarining kengash faoliyatini tugatish to'g'risidagi ko'pchilik ovozi bilan ma'qullangan qarori belgilangan taqdirda tasdiqlanganda;

qonunda ko'rsatilgan boshqa shu kabi vazirlik faoliyatiga salbiy ta'sir o'tkazuvchi noqonuniy harakat yoki harakatsizliklar sodir etilganda.

36. Vazir buyrug‘i Jamoatchilik kengashi faoliyatini tugatish uchun asos bo‘lib xizmat qiladi.

5-bob. Jamoatchilik kengashi a‘zolarini moddiy rag‘batlantirish tartibi

37. Kengashning vazirlikda faoliyat yuritayotgan a‘zolari ishdagi faolligi, tashabbuskorligi, vazirlik nufuzini oshirishga doir sa‘y-harakatlari hamda jamoatchilik nazoratini amalga oshirishda alohida ko‘rsatgan xizmatlari uchun ma‘naviy va moddiy rag‘batlantirilishi mumkin.

Shuningdek, rag‘batlantirish “O‘zbekiston Respublikasi Xalq ta‘limi a‘lochisi” yoki “Xalq ta‘limi fidoiysi” ko‘krak nishoni, vazirlik tashakkurnomasi, faxriy yorlig‘i bilan taqdirlash, davlat mukofotiga nomzodini tavsiya etish shaklida vazirlikning budjetdan tashqari jamg‘arma mablag‘alari hamda qonun bilan taqiqlanmagan boshqa mablag‘lar hisobidan berilishi mumkin.

Kengash a‘zolari vazir qaroriga asosan rag‘batlantiriladi va tashkilot veb-saytida ochiq e‘lon qilinadi.

6-bob. Yakunlovchi qoidalar

38. Jamoatchilik kengashining faoliyatini moddiy-texnik jihatdan ta‘minlash vazirlik tomonidan, shuningdek qonun hujjatlarida taqiqlanmagan boshqa manbalar hisobidan amalga oshiriladi.

39. Jamoatchilik kengashining faoliyati uning Nizomiga va O‘zbekiston Respublikasining qonun hujjatlariga muvofiqligi vazir tomonidan nazorat qilinadi.

40. Jamoatchilik kengashining qarorlari ustidan belgilangan tartibda shikoyat qilinishi mumkin.